



Në mbështetje të nenit 5, paragrafi 1, nënparagrafi 1.1, pika 1.1.1, nenit 12 paragrafi 1, nënparagrafi 1.5 dhe nenit 22, paragrafi 3, të Ligjit Nr.08/L-017 për Agjencinë për Parandalimin e Korrupsionit, nenit 21 paragrafi 2 të Ligjit nr. 06/L-011, për Parandalimin e Konfliktit të Interesit në Ushtrimin e Funkcionit Publik, neni 11, paragrafi 4, i Rregullores Nr. 03/20023 për Procedurat për Hetimet Administrative në Agjencinë për Parandalimin e Korrupsionit, Drejtori i Agjencisë për Parandalimin e Korrupsionit, me datë 12.08.2025, nxjerrë këtë:

V E N D I M

- I. Shpërblimi me kontratë si *Ekspert i Ekonomisë- Prokurimit* për ish-zyrtarin e lartë Bedri Obërtinca nga institucioni ku ka ushtruar funksionin publik, pa kaluar dy vite nga përfundimi i funksionit të tij si (ish) Menaxher i Prokurimit në Komunën e Fushë Kosovës, bie ndesh me dispozitën e nenit 18, paragrafi 1, nënparagrafi 1.2. të Ligjit për Parandalimin e Konfliktit të Interesit;
- II. Agjencia për Parandalimin e Korrupsionit, në mbështetje të nenit 22, paragrafi 13, nenit 24, paragrafi 5, lidhur me nenin 19, paragrafi 2, nënparagrafi 2.5, dhe paragrafi 4 të Ligjit për Parandalimin e Konfliktit të Interesit, si dhe nenin 12, paragrafi 1, nënparagrafi 1.5, të Rregullores nr. 03/2023 për procedurat për hetimet administrative në Agjencinë për Parandalimin e Korrupsionit, kërkon shfuqizimin¹ e Kontratës me Nr.: 612-25-2932-2-2-1/C628, nga institucioni që e ka lëshuar atë në kundërshtim me dispozitat e Ligjit për Parandalimin e Konfliktit të Interesit;
- III. Agjencia për Parandalimin e Korrupsionit, inicion procedurë kundërvajtëse në gjykatën kompetente për shkak të shkeljeve të detyrimeve të përcaktuara me Ligjin për Parandalimin e Konfliktit të Interesit;
- IV. Ky vendim është përfundimtar në procedurën administrative dhe i njëjti publikohet në uebfaqen zyrtare të Agjencisë për Parandalimin e Korrupsionit.

A r s y e t i m

I. Rasti i hapur nën dyshimin për konflikt interesi për ish zyrtarin e lartë Bedri Obërtinca, tani Ekspert i Ekonomisë - Prokurimit në komunën e Fushë Kosovës është trajtuar sipas procedurës së paraparë me Ligjin për Parandalimin e Konfliktit të Interesit në Ushtrimin e Funkcionit Publik.

¹ Agjencia për Parandalimin e Korrupsionit, me rastin e kërkesës për shfuqizim të kontratës në fjalë ka pasur parasysh edhe dispozitat relevante për shfuqizim apo anulim diskrecionar të aktit administrativ, të Ligjit Nr. 05/L-031 të i Procedurës së Përgjithshme Administrative.

Agjencia për Parandalimin e Korrupsionit ka filluar trajtimin e këtij rasti pas pranimit të një raportimi nga jashtë APK-DPKI-06-831/25 me pretendimet se (citojmë):

“ [...] Në platformën E- prokurimi kemi parë që komuna e Fushë Kosovës më 15.05.2025 ka njoftuar për nënshkrimin e një kontrate për angazhimin e një ekspertit Ekonomisë- Prokurimit. Personi i cili është angazhuar për këtë shërbim, figuron se është Bedri Obërtinca. I njëjti ka ushtruar funksionin e shefit të prokurimit të paktën deri në dhjetor të vitit 2024. Më poshtë i keni disa pyetje:

1. A paraqet konflikt interesi ky angazhim i z. Bedri Obërtinca?
2. A ka ndonjë kufizim për angazhimin e tij? [...]”.

Në pajtim me nenin 22, paragrafin 3, dhe 5 të Ligjit për Parandalimin e Konfliktit të Interesit, Agjencia për Parandalimin e Korrupsionit përmes shkresës zyrtare (APK-DPKI-880/25), e ka njoftuar palën për fillimin e procedurës së shqyrtimit të gjendjes së konfliktit të interesit. Më pas, është organizuar edhe një takim me palën Bedri Obërtinca në zyrat e Agjencisë, me ç'rast i njëjti ka konfirmuar se pretendimet e ngritura janë të vërteta, porse nuk ka qenë në dijeni se një gjë e tillë është e ndaluar me ligj.

Me qëllim të sqarimit të plotë të këtij rasti, Agjencia për Parandalimin e Korrupsionit ka siguruar dokumentacion/informacion të nevojshme (DPKI-954/25) nga Komuna e Fushë Kosovës si dhe dokumentacion tjetër relevant sipas detyrës zyrtare ku pas shqyrtimit dhe analizimit të të cilëve ka konstatuar gjendjen faktike si në vijim:

Përmes shkresës së datës 04.04.2025 me nr. të referencës 01/25, katër (4) drejtori brenda komunës së Fushë Kosovës (Drejtoria për DSHMS-së, Drejtori i Shërbimeve Publike dhe Mjedis, Drejtoria për Gjeodezi, Kadastër dhe Pronë dhe Drejtoria për Planifikim Urban), kanë adresuar tek kryetari kësaj komune, lejin e mjeteve financiare në vlerë prej 50,000 euro, për zhvillimin e procedurës së prokurimit për Shërbimet e Veçanta për angazhimin e disa ekspertëve nga lami të ndryshme e në mesin e tyre edhe një Ekspert për Ekonomi (Prokurim).

Më datë 07.04.2025 është nxjerr Vendimi me nr. 415 nga Kryetari i komunës së Fushë Kosovës, përmes të cilit lejohen mjetet financiare në shumë prej 50,000 euro për fillimin e procedurave të prokurimit për angazhimin e 8 ekspertëve për Shërbime të Veçanta për periudhën prej 8 muajve me mundësi vazhdimi edhe për 4 muaj.

Pastaj, përmes shkresës së datës 08.04.2025 me nr. 60/2025, nga katër (4) drejtorë të komunës së Fushë Kosovës, autorizohet zyra e prokurimit për fillimin e procedurave të prokurimit për aktivitetin e prokurimit me titull: “Shërbime të veçanta për angazhimin e ekspertëve”.

Më pas, përmes Njoftimit për Kontratë të datës 11.04.2025, është iniciuar aktiviteti i prokurimit me titull: Shërbime të Veçanta për angazhimin e ekspertëve, me numër të prokurimit: 612-25-2932-2-2-1.

Me Vendim të datës 05.05.2025, ishte formuar Komisioni i Vlerësimit nga Kryetari i komunës së Fushë Kosovës, për vlerësimin e projektit me titull: “Shërbime të Veçanta për angazhimin e ekspertëve”. Komisioni i vlerësimit përmes Raportit të Vlerësimit të Tenderëve të datës 05.05.2025, kishte rekomanduar si në vijim: *Komisioni vlerësues pas ekzaminimit, vlerësimit dhe krahasimit të ofertave i rekomandon zyrtarit përgjegjës të prokurimit që për projektin Shërbime të veçanta për angazhimin e eksperteve ta shpërblej z. Bedri Obërtinca për LOT 4. Rekomandimi i komisionit vlerësues lidhur me shpërbllimin me kontratë për Lotin 4 kishte*

marrë aprovimin edhe të zyrtarit përgjegjës të prokurimit znj. Ismete Prebreza dhe në bazë të këtij rekomandimi, zyrtari përgjegjës i prokurimit znj. Ismete Prebreza, kishte nxjerr Njoftimin mbi Vendimin e Autoritetit Kontraktues me nr. të prokurimit: 612-25-2932-2-2-1 dhe nr. të brendshëm: 612 25 021 221, përmes të cilit për Lot 4 kishte shpërblyer me kontratë personin fizik Bedri Obërtinca, i cili deri më datë 27.03.2025 ishte në pozitën e Menaxherit të Zyrës së Prokurimit në Komunën e Fushë Kosovës.

Mbarimi i funksionit publik të z. Berisha është konstatuar edhe nga formulari i deklarimit të pasurisë, i cili më datë 14.04.2025 ka dorëzuar në Agjencinë për Parandalimin e Korrupsionit formularin e Deklarimit pas Mbarimit apo Shkarkimit nga Funksioni.

Pra, në vështrim të gjendjes faktike si më lartë, Agjencia për Parandalimin e Korrupsionit konstaton se përfshirja në marrëdhënie kontraktore drejtpërdrejtë e Bedri Obërtinca me institucionin ku ka ushtruar funksionin publik (si Menaxher i Prokurimit në Komunën e Fushë Kosovës), pa kaluar dy (2) vite nga përfundimi i funksionit të tij publik, është në kundërshtim me nenin 18, paragrafi 1, nënparagrafi 1.2 të Ligjit për Parandalimin e Konfliktit të Interesit, ku është përcaktuar se:

"1. Zyrtari i lartë nuk ka të drejtë:

1.2. të përfshihet në marrëdhënie kontraktore, drejtpërdrejt ose nëpërmjet ndonjë personi të afërm ose të besuar, me institucionin ku ka ushtruar funksionin publik për një periudhë deri në dy (2) vjet pas përfundimit të funksionit publik".

Pra, në rastin konkret, Bedri Obërtinca pa kaluar dy (2) vite pas përfundimit të funksionit publik si udhëheqës i Prokurimit në Komunën e Fushë Kosovës, është përfshirë në marrëdhënie kontraktore, drejtpërdrejt, me institucionin ku i njëjti ka ushtruar funksionin publik dhe kështu ka rënë ndesh me dispozitën e sipërcituar të Ligjit për Parandalimin e Konfliktit të Interesit.

II. Agjencia për Parandalimin e Korrupsionit në mbështetje të nenit 22, paragrafi 13, nenit 24, paragrafi 5, lidhur me nenin 19, paragrafi 2 (nënpagafafi 2.5) dhe paragrafi 4, të Ligjit për Parandalimin e Konfliktit të Interesit, si dhe në nenin 12, paragrafi 1, nënpagafafi 1.5, të Rregullores nr. 03/2023 për procedurat për hetimet administrative në Agjencinë për Parandalimin e Korrupsionit, kërkon shfuqizimin e Kontratës me Nr.: 612-25-2932-2-2-1/C628, nga institucioni që e ka lëshuar atë në kundërshtim me detyrimet që derivojnë nga dispozitat e Ligjit për Parandalimin e Konfliktit të Interesit.

Në këtë mënyrë, paragrafi 2, nënpagafafi 2.5, dhe paragrafi 4 i nenit 19 të Ligjit për Parandalimin e Konfliktit të Interesit, kanë përcaktuar se:

"2. Çdo udhëheqës i zyrtarit ose institucion udhëheqës merr masat e nevojshme, të përshkallëzuara dhe proporcionale për të shmangur paraprakisht dhe në çdo rast konfliktin real ose të mundshëm të interesave për shkak të zgjedhjes, emërimit apo caktimit të detyrave ose përgjegjësiive të caktuara të zyrtarit. Këto masa përfshijnë por nuk kufizohen:

2.5. revokimin ose anulimin e një akti të marrë në kushtet e konfliktit të interesave".

Ndërsa, me nenin 22, paragrafi 13 i Ligjit për Parandalimin e Konfliktit të Interesit, është përcaktuar se:

" Agjencia i kërkon rishqyrtimin, revokimin dhe/ose shfuqizimin e aktit të nxjerrë në konflikt të interesit organit që e ka nxjerrë atë. Që nga momenti kur Agjencia kërkon rishqyrtimin e vendimit, çdo veprim për zbatimin e tij pezullohet deri në momentin kur organi vendos për vlefshmërinë e vendimit.

Sikurse, neni 24, paragrafi 5 i Ligjit për Parandalimin e Konfliktit të Interesit, përcakton se:

“Agjencia inicion procedurën administrative për revokimin ose shfuqizimin e akteve nga ana e institucionit që i ka lëshuar ato në konflikt interesi”.

Në zbatim të dispozitës pararendëse, me nenin 12 [Veprimet pas përfundimit të hetimit administrativ], paragrafi 1, nënparagrafi 1.5 të Rregullores nr. 03/2023 për procedurat për hetimet administrative në Agjencinë për Parandalimin e Korrupsionit, është përcaktuar se:

“1. Veprimet e Agjencisë në raport me epilogun e procedurës së zhvilluar të hetimit administrativ përfshijnë, por nuk kufizohen në:

1.5 Kërkesë për rishqyrtimin, revokimin dhe/ose shfuqizimin e aktit të nxjerrë në konflikt të interesit organit që e ka nxjerrë atë”

Së fundmi, në kuptim të pikës II të dispozitivit të këtij vendimi, Komuna e Fushë Kosovës duhet ta njoftoj Agjencinë për Parandalimin e Korrupsionit lidhur me veprimet e ndërmarra, konform nenit 19, paragrafi 4, ku është përcaktuar se:

“Udhëheqësi ose institucioni udhëheqës njoftojnë Agjencinë për masat e marra për parandalimin dhe zgjidhjen e konfliktit të interesit ose papajtueshmërive sipas këtij ligji”.

Përkatësisht, nenit 22, paragrafi 11 të Ligjit për Parandalimin e Konfliktit të Interesit, ku është përcaktuar se:

“Organet kompetente njoftojnë Agjencinë brenda pesëmbëdhjetë (15) ditësh nga marrja e njoftimit për veprimet e ndërmarra prej tyre.”

III. Agjencia për Parandalimin e Korrupsionit, për shkak të shkeljes së detyrimeve që derivojnë nga Ligji për Parandalimin e Konfliktit të Interesit nga Bedri Obërtinca, konkretisht mos zbatimit të kufizimeve të përcaktuara me nenin 18, paragrafi 1, nën-paragrafi 1.2, lidhur me nenin 23, paragrafi 1, nënparagrafi 1.2 të Ligjit për Parandalimin e Konfliktit të Interesit, do ta procedoj rastin në Gjykatën kompetente.

VI. Agjencia vendosi si në pikën IV të dispozitivit të këtij vendimi, duke u bazuar në nenin 22 [Procedura administrative e Agjencisë për rastet e konfliktit të interesit], paragrafi 12 të Ligjit për Parandalimin e Konfliktit të Interesit, me të cilin është përcaktuar se: *“Të gjitha vendimet që i nxjerr Agjencia lidhur me konfliktin e interesit në ushtrimin e funksionit publik dhe shkeljen e dispozitave të këtij ligji, përfshirë veprimet e ndaluara ose të kufizuara në ushtrimin e funksionit publik, ushtrimin e veprimtarive të tjera, papajtueshmëritë në ushtrimin e funksionit publik, duhet të respektohen nga zyrtarët dhe institucionet përgjegjëse. Ato bëhen publike në faqen zyrtare të internetit të Agjencisë.”*, si dhe paragrafin 15 të këtij neni, me të cilin është përcaktuar se: *“Vendimet e Agjencisë në lidhje me konfliktin e interesit janë përfundimtare në procedurë administrative.”*

Nga sa u tha më lartë, u vendos si në dispozitiv të këtij vendimi.

Vendimi iu dërgohet:

- Zyrtarit të lartë publik
- Drejtorit të DPKI-së
- Z./znj. (zyrtari përgjegjës)


YLLI BULESHKAJ
Drejtor i Agjencisë për
Parandalimin e Korrupsionit